

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. केंद्री गृह मंत्री अमित शाह होरें सी.आर.पी.एफ कर्मिणं दी सराहना करदे होई आखेआ ऐ जे जम्मू-कश्मीर च रमानदारी बहाल करने च बल मती महत्वै आहली भूमिका निभा करदा ऐ।
2. उपराज्यपाल मनोज सिन्हा होरें आखेआ ऐ जे पाकिस्तान जम्मू-कश्मीर दी रमानदारी च खलल पाने लेई हर कोश्ट करा करदा ऐ-पर स्हाड़े सुरक्षाबलें कुसै बी चुनौती दा मकाबला करने लेई पूरी चाल्ली तैयार ना।
3. रक्षा मंत्री राजनाथ सिंह होरें आखेआ जे भारत रक्षा क्षेत्र च आत्मनिर्भर बनने दे कन्नोकत्री अपनी निर्यात छमताएं गी बी तेजिया कन्नै बधा करदा ऐ।
4. जंदी रातीं जम्मू च झुल्ले दे जबरदस्त अंधी-झक्खड़ दे बाद आम जीवन प्रभावित, बिजली ते पानी दी सप्लाई पर बी असर, केई इलाकें च बिजली दी सप्लाई अजें बी बंद ऐ।

<><><><><><>

Shah-CRPF

केंद्री गृह मंत्री अमित शाह होरें अज्ज आखेआ जे केंद्री रिजर्व पुलस बल सी.आर.पी.एफ नै जम्मू-कश्मीर सने मुलखै च रमानदारी बनाई रखने च इक अहम रोल अदा कीता ऐ ते भविक्ख च बी एह बिल अपनी इस भूमिका गी असरदार ढंग्गै सिर निभाग। उनें आखेआ जे 31 मार्च 2026 तगर मुलखै थमां नक्सलवादिणं दा पूरी चाल्ली खात्मा करी देने दे केंद्र सरकार दे धेइयै गी मूर्त रूप देने च बी सी.आर.पी.एफ महत्वपूर्ण रोल निभाग। अज्ज मध्य प्रदेश दे नीमच च आयोजित 86मीं सी.आर.पी.एफ दिवस परेड कार्यक्रमें दौरान अपने संबोधनै च गृह मंत्री होरें सी.आर.पी.एफ दी बडी मती सिफत करदे होई आखेआ जे मुलखै दी एकता ते अखंडता गी बनाई रखने च बलै कदें

कोई कसर नेई छोड़ी। अमित शाह होरें आखेआ जे जम्मू-कश्मीर च दफा 370 ढाए जाने दी प्रक्रिया दौरान बी उत्थै सी.आर.पी.एफ गी तैनात कीता गेदा हा ते ओहदे बाद उत्थै कोई हिंसा, प्रदर्शन या पत्थरबाजी नेई होग। उनें अगगे उनें अगगे आखेआ जे कनून बवस्था बनाई रखने दे अलावा कई प्रमुख आयोजनें दौरान बी अपनी जिम्मेदारी गी कामयाबी कन्नै तोड़ चाढेआ ऐ। भाएं ओहू श्री अमरनाथ जी दी यात्रा होऐ, वैष्णो देवी यात्रा, श्री राम जनम भूमि दी रक्षा, कृष्ण भूमि दी सुरक्षा जां हाल च आयोजित महाकुम्भा।

<><><><><><>

PM-Yamuna

प्रधानमंत्री नरेंद्र मोदी होरें अज्ज नमीं दिल्ली च यमुना नदी दी मौजूदा स्थिति दा आंकलन करने आस्तै व्यापक समीक्षा बैठक दी अध्यक्षता कीती। बैठक च यमुना दी सफाई ते ओदी भविक्ख सरबन्धी योजनाएं पर चर्चा कीती गेई। मोदी होरें सलाह दिती जे नालिएं दे प्रवाह मापने दे कन्नो-कन्नी गंदे पानी गी परतिए इस्तेमाल करने जोग बनाने आहले संयंत्रें दी कार्यप्रणाली दी निगरानी आस्तै भलेआं हेठली सतह पर असल आंकड़े किट्टे करने आस्तै बेहतरिन प्रौद्योगिकी दा इस्तेमाल कीता जाना लोड़चदा।

<><><><><><>

LG-Health

उपराज्यपाल मनोज सिन्हा होरें अज्ज आखेआ ऐ जे पाकिस्तान इक नाकाम मुल्ख होने दे बावजूद बी दक्खन एशिया दी रमानदारी च खलल पाने गितै बन्ने पारा आतंकवाद फैलाने दा कम्म करा करदा ऐ, पर स्हाड़े सुरक्षाबल कुसै बी चाल्ली दी चुनौती दा मकाबला करने ते ओहदा बनकदा परता देने लेई पूरी चाल्ली समर्थवान ते तैयार ना। एहू गल्ल एल.जी होरें अज्ज डोडा जिले दे भद्रवाह इलाके च इक किट्टे गी संबोधित करदे होई आक्खी जित्थे ओहू रोटरी इंटरनेशनल आसेआ सेहत ते मेडिकल शिक्षा विभाग आसेआ लोआए गेदे 6एं दिनें दे सर्जिकल कैंप दा उद्घाटन करा रदे हे। एहू कैंप कन्नोकन्नी डोडा, भद्रवाह ते किशतवाड़ च ल लोआए जा करदे ना। इस मौके जम्मू दे डिविजनल कमिशनर, डोडा दे जिला विकास काउंसल दे चेयरमैन ते सिविल ते पुलस प्रशासन दे कई

अफसर बी मौजूद हे। एल.जी होरें आखेआ जे जम्मू-कश्मीर दी सुरक्षा गी लेइए सरकार दी नीति पूरी चाल्ली साफ ऐ ते एहदे नै कुसै चाल्ली दा कोई समझौता नेई कीता जाई सकदा।

<><><><><><>

SC-Waqf

सुप्रीम कोर्ट नै अज्ज केंद्र सरकार दे उस यकीन दिहानी गी दर्ज कीता जे अगली सुनवाई तगर वक्फ तरमीमी कनून-2025 दे तैहत वक्फ बोर्ड या केंद्री वक्फ काउंसल च कोई नमीं तैनाती या भर्ती नेई कीती जाग। प्रधान न्यायधीश संजीव खन्ना हुंदी अगुवाई आहली पीठै जस्टिस संजय कुमार ते के.वी विश्वनाथन हुंदे कन्नै सॉलीसीटर जनरल तुषार महता हुंदे इस आश्वासन पर बी गौर कीता गेआ जे मजूदा वक्फ संपत्तिएं दी स्थिति, जेदे च इनें संपत्तिएं गी इस्तेमाल करने आहलें आसेआ वक्फ दे रूपै च बक्ख-बक्ख श्रेणी च बंडी गेदियां संपत्तियां बी शामिल न, फिलहाल उंदे च कोई बदलाव नेई कीता जाग। अदालतै केंद्र सरकार गी वक्फ कनून 1995 च हाल च कीती गेदिएं तरमीमें दी संवैधानिक वैधता गी चनौती देने आहली ते रोक लाने दी मंग करने आहलिये अर्जिये पर 7एं दिनें दे अंदर-अंदर अपना जवाब दाखल करने दा बी निर्देश दित्ता ऐ। इनें अर्जिये दी गिनतरी केया मती होने दे कारण पीठै अर्जी दाखल करने आहलें कोला सुनवाई लेई 5 प्रमुख मामलें दी पन्ड्यान करने लेई आखेआ गेआ ऐ। इनें मामलें दी सुनवाई हून 5 मई गी होग।

<><><><><><>

Rajnath-Defence

रक्षा मंत्री राजनाथ सिंह होरें अज्ज आखेआ ऐ जे भारत दा रक्षा क्षेत्र आत्मनिर्भरता दी बतै पर अगड़े बधै करदा ऐ ते दुनिया च रक्षा उत्पादनें दे निर्यात च एहदी छमता उप्परोतली बधदी जा करदी ऐ। नमीं दिल्ली च डिफेंस कन्क्लेव फोर्स ऑफ द फ्यूचर दा उद्घाटन करदे मौके अपने संबोधनै च राजनाथ सिंह होरें आखेआ जे सरकार रक्षा क्षेत्र दिएं छमताएं गी बधाने पर विशेष ध्यान देआ करदी ऐ। उनें आखेआ जे नरेंद्र मोदी सरकार नै थेआरबंद बलें गी भलेआं अज्जै-कल्लै दिएं तकनीकें ते सुविधाएं कन्नै लैस करने दे कन्नोकन्नी रक्षा क्षेत्र च आत्मनिर्भरता पर बी ध्यान केंद्रित कीता ऐ। उनें आखेआ जे रक्षा क्षेत्र च आत्मनिर्भरता गी होर बढ़ावा देने लेई मंत्रालय नै 2025 गी सुधार आहला बरा घोषित कीता ऐ।

इस सम्मेलन दा मकसद भारत दे उभरदी रक्षा क्षेत्र छमता बारै हर पैहलु पर चर्चा करना ऐ।

<><><><><><>

Jammu Winds

जम्मू कश्मीर व 100 किलोमीटर फही घैंटे थमां ब; दी रफ्तार कन्नै हवा चली। अंधी झक्खड़, भारी बरखा ते किश थाहें ऐन गड़ा पौने करी जम्मू खित्ते च कल संजा आम जीवन प्रभावत होआ। आकाशवाणी जम्मू संवाददाता दी रिपोर्ट मूजब अंधी करी केई सारे बूहटे, बिजली दे खम्बे ते टाँवर बगैरा डिग्गी गे, इस करी जम्मू खित्ते दे 10 जिलें च बिजली सेवा प्रभावत होई। जम्मू शैह्ला ते होर दुइएं जरनैली शिड़कें पर यातायात प्रभावत होई। जम्मू आले सिविल सचिवालय दी दिवार दे इक हिस्से दे डिग्गी पौने करी केई सारी गड्डिएं गी नुक्सान पुज्जा ऐ। बाहु इलाके च सेल फोन दा टावर डिग्गी पेआ। हादसे च कुसै दे घायल होने दी खबर नेई ऐ। इलाके च बिजली ते पानी सप्लाई बी प्रभावित होई ऐ। अमले ते मशीनें गी कम्मै पर लाया गेदा ऐ। मौसम विभाग नै 18-19 अप्रैल बरखा केई सारी थाहें पर हल्की थमां दरम्याने दर्जे दी बरखा ते उच्चिएं धारें पर बर्फबारी ते दरम्याने दर्जे थमां भारी बरखा पौने दे असार दस्से न। 19 अप्रैल लेई विभाग आसेआ येलो ते ओरेंज अलर्ट जारी कीता ऐ।

<><><><><><>

Army-Saves

रियासी जिले दी तलवाड़ा थाहर इक कच्चा मकान ढेई पौने करी ओदे मलबे हेठ फसे दी महिला ते त्रै बच्चें गी भारती फौज नै सफलतापूर्वक बचाई लैता। एह मकान भारी बरखा ते अंधी झक्खड़ झुल्लने करी ढेई पेआ। समेंसिर कीती गेदी कार्रवाई करी कीमती जानें गी बचाया गेआ।

<><><><><><>

Reasi-MESM

उद्योग ते बपार मैहकमे नै जम्मू ते कश्मीर उद्यमियता विकास संस्थान जे.के.ई.डी.आई ते जम्मू-कश्मीर च बपार कारोबार गी बढ़ावा देने सरबंधी संगठन जे.के.टी.पी.ओ आसेआ जिला सतह दी कार्यशाला दा रियासी च सरिस्ता कीता गेआ तां जे रणनीतिक निवेश योजना दी अमलावरी बारै जायजा लैता जाई सकै। इस कार्यशाला

दा मकसद सरबंधी धडें, अमलावरी सरबंधी एजेंसिएं च जागरूकता पैदा करना हा जेदे राएं खित्ते च एम.एस.एम.ई आहले माहौल गी बढावा थ्होई सकै। कार्यक्रम दौरान जिला उद्योग केंद्र दे जनरल मैनेजर किशोर सिंह कटोच होरें आखेआ।

<><><><><><>